

A Xunta de Goberno desta Deputación Provincial na súa sesión ordinaria do día 13 de xaneiro de 2023, adoptou, entre outros, o seguinte acordo:

18.32461.- APROBACIÓN DO PROXECTO MODIFICADO DA OBRA “TRASLADO DO PARQUE DE MAQUINARIA AO POLÍGONO DE BARRO” E NOVO ENCARGO Á EMPRESA TRAGSA, COMO MEDIO PROPIO DA DEPUTACIÓN DE PONTEVEDRA, NO MARCO DAS ACTUACIÓNS DA RESTAURACIÓN AMBIENTAL DA XUNQUEIRA DE ALBA (Expte.2021064404)

Antecedentes de feito:

Primeiro. A Xunta de Goberno da Deputación Provincial de Pontevedra, na sesión ordinaria celebrada o 30 de decembro de 2021 (acordo nº 14.31135), encargou á empresa TRAGSA S.A. S.M.E. M.P., como medio propio da Deputación de Pontevedra, a execución de todas as actuacións derivadas da restauración ambiental da Xunqueira de Alba, ascendendo a proposta económica do encargo a un importe de 3.623.999,96 €.

Segundo. Unha das actuacións contempladas é a relativa ao traslado do Parque de Maquinaria ao Polígono de Barro (proxecto de execución elaborado por PROYFE S.L.-CSV OEBZS8YTU4ZIS5ND), cun orzamento de 2.288.730,63 euros e un prazo inicial de execución de oito meses, prazo ampliado ata o 28 de febreiro de 2023 por acordo da Xunta de Goberno de data 16 de setembro de 2022.

Terceiro. Posteriormente, a Xunta de Goberno da Deputación de Pontevedra, na sesión celebrada o 7 de outubro de 2022, acordou autorizar a redacción do proxecto modificado da obra “Traslado do parque de maquinaria ao Polígono de Barro”, no marco das actuacións de restauración ambiental da Xunqueira de Alba encargadas á empresa TRAGSA como medio propio da Deputación de Pontevedra, en base aos informes técnicos que obran no expediente administrativo da súa razón.

Cuarto. Elaborado polo Servizo de Arquitectura o proxecto modificado da obra “Traslado do parque de maquinaria ao Polígono de Barro”, cun orzamento de 2.745.532,96 €, en data 29 de decembro de 2022 concedeuse trámite de audiencia tanto ao redactor do proxecto orixinal (PROYFE) como á empresa TRAGSA, mostrando ambos a súa conformidade respecto da súa tramitación. Consta así mesmo no expediente, informe favorable de supervisión do citado proxecto modificado.

Quinto. Así mesmo, Servizo de Infraestruturas informa que no encargo non foron incluídos os servizos de traslado e reinstalación de diversos equipos fixos do taller mecánico que se atopan en bo estado de conservación e son necesarios nas novas instalacións, así como acometer unha serie de instalacións temporais, sendo urxente incluílos nun novo encargo da Deputación de Pontevedra á empresa Tragsa no marco das actuacións derivadas da restauración ambiental da Xunqueira de Alba.



Normativa aplicable, consideracións técnicas e xurídicas:

O réxime xurídico dos encargos a medios propios ven determinado polos artigos da LCSP dedicados a estes (artigos 32 e 33), e en relación a TRAGSA e a súa filial TRAGSATEC, pola disposición adicional 24ª da LCSP e polo RD 69/2019, do 15 de febreiro.

As relacións de TRAGSA cos poderes adjudicadores dos que son medios propios teñen natureza instrumental e non contractual, polo que a todos os efectos son de carácter interno, dependente e subordinado, estando obrigada a realizar, con carácter exclusivo, os encargos que aqueles lles encomenden.

O importe das obras, traballos, subministracións, estudos e proxectos realizados por TRAGSA se determinará aplicando ás unidades directamente executadas polo medio propio as tarifas correspondentes, atendendo ao coste efectivo soportado polo medio propio para as actividades obxecto do encargo que se subcontraten con empresarios particulares (disposición adicional 24ª da LCSP, en relación cos artigos 6 e ss. do R.D. 69/2019).

O artigo 11.6 do RD 69/2019, do 15 de febreiro, sinala que nos encargos cuxo obxecto sexa a execución de obras, liquidaranse a TRAGSA os excesos de obra executada sen necesidade de tramitar unha modificación do encargo cando as variacións consistan no número de unidades realmente executadas sobre as prevista nas medicións do proxecto, sempre que non representen un incremento do gasto superior ao 10 por cento do orzamento contido na formalización do encargo, imposto sobre o Valor Engadido ou equivalente excluído.

A constatación do cumprimento do encargo e, cando proceda, a recepción da prestación realizaranse de acordo co establecido no artigo 210 da Lei 9/2017, do 8 de novembro, de Contratos do Sector Público (artigo 11 do RD. 69/2019).

En canto ao procedemento aplicable ás modificacións e outras incidencias dos encargos a medios propios, haberá de estar en primeiro lugar ao establecido no documento de formalización xa que logo nos atopamos ante unha relación de carácter interno e non contractual; e en defecto de previsión específica, a modificación do proxecto axustarase ao disposto nos artigos 203 a 207 e no artigo 242 da Lei 9/2017, coas adaptacións ou especificidades que correspondan ao tratarse dun encargo a un medio propio.

No referido ás obras do traslado do Parque de Maquinaria, no presente expediente consta a posibilidade expresa de modificar o encargo como consecuencia da necesidade de modificar o proxecto sen que aquela, de acordo cos prezos unitarios- segundo tarifa-nos que se descompón o orzamento do medio propio, poida superar a porcentaxe do 20% da cantidade fixada inicialmente.

En relación co anterior, o proxecto modificado ten un orzamento de 2.745.532,96 €, o que supón un incremento de 456.802,33 € (19,96%) respecto do importe fixado inicialmente no proxecto, e a súa redacción ven motivada por unha serie de circunstancias reflectidas no informe do Servizo de Arquitectura de data 29 de decembro de 2022 (CSV:LPIHZB4IKNWBQUEY).



En dito informe ponse de manifesto que a medida que avanzaban os traballos se observaron as primeiras discrepancias entre o recollido no proxecto e a realidade da obra, discrepancias que non podían ser previstas nin na comprobación do reformulo nin durante a supervisión do proxecto posto que se revelan progresivamente tralo inicio dos traballos e que se poden encadrar en dúas categorías:

- a) Tarefas incluídas na documentación técnica do proxecto (prego, memoria, planos, descompostos de unidades...etc.) pero cuxa medición non concorda coa realidade da obra, toda vez que se inician os traballos das mesmas, polo que a partida imputada no orzamento non cubre os costes reais.
- b) Tarefas non incluídas no proxecto, debido a inexactitudes do mesmo respecto da realidade física atopada tralo inicio das obras, que a xuízo da dirección facultativa deben ser executadas para que unha vez finalizadas as mesmas o parque poda ser utilizado en boas condicións.

Este modificado e os traballos incluídos nel, implican un aumento de prazo de execución de un (1) mes, alcanzando un prazo de execución total de catorce (14) meses.

O proxecto modificado se presenta antes de rematar o prazo de execución e introduce as variacións estritamente necesarias e indispensables para responder ás causas obxectivas que fixeron necesaria a súa redacción, respondendo a razóns de interese público.

O seu importe afrontarase con cargo ás aplicacións 23/457.4500.622.03.2022 e 23/457.4500.632.03.2022 do vixente Orzamento Provincial.

Consta no expediente escrito de conformidade do redactor do proxecto e da empresa TRAGSA, onde acepta expresamente o proxecto modificado e os seus prezos, así como informe favorable de supervisión do citado proxecto modificado.

Así mesmo, tal e como informa o Servizo de Infraestruturas, (CSV):HWXWUPM05QAX5S62, é necesario realizar un novo encargo incorporando os servizos de traslado e reinstalación de diversos equipos fixos do taller mecánico do Parque que se atopan en bo estado de conservación e son necesarios nas novas instalacións; ademais, o ritmo de execución dos traballos da nova construción fai que a demolición das actuais teña que facerse antes do remate das novas, polo que xorde a necesidade de dispor dunhas instalación temporais, de carácter mínimo ou básico, mentres non se poida facer uso das definitivas.

O importe destas actuacións adicionais, segundo o orzamento que figura no expediente, ascende á cantidade de 46.799,24 €, IVE incluído, que se afrontará con cargo á aplicación 23/456.4530.633.01 do vixente orzamento provincial ao ser o Servizo de Infraestruturas o centro xestor que solicitou a súa tramitación.

Visto o informe do Xefe do Servizo de Asistencia Intermunicipal co (CSV): UP641FHQGP1KZRIZ, que conta co conforme do Secretario Xeral.



Vista a dilixencia de conformidade da Intervención respecto á tramitación do presente expediente (CSV):56XLW2DND6340ZW0.

Á vista do exposto, de conformidade co disposto no artigo 35 da Lei 7/1985, do 2 de abril, Reguladora das Bases de Réxime Local e en aplicación das bases aprobadas para a execución do orzamento, a Xunta de Goberno acorda por unanimidade:

Primeiro. Aprobar o proxecto modificado da obra “TRASLADO DO PARQUE DE MAQUINARIA AO POLÍGONO DE BARRO”, por importe de 2.745.532,96 €, que supón un incremento cuantitativo con respecto ao proxecto inicial de 456.802,33 €, que se afrontará con cargo ás aplicacións 23/457.4500.622.03.2022 e 23/457.4500.632.03.2022 do vixente Orzamento Provincial.

Segundo. Conceder á empresa TRAGSA S.A., S.M.E, MP, como medio propio da Deputación de Pontevedra, unha prórroga de UN (1) MES na execución do citado proxecto, establecendo como data para finalizar a obra o 28 de marzo de 2023.

Terceiro. Realizar un novo encargo á empresa TRAGSA S.A., S.M.E, MP, que abarca os servizos de traslado e reinstalación de diversos equipos fixos do taller mecánico do Parque de Maquinaria e instalacións provisionais, nos termos expostos no informe do Servizo de Infraestruturas mencionado nos antecedentes de feito.

O importe destas actuacións ascende á cantidade de 46.799,24 euros, IVE incluído, que se afrontará con cargo á aplicación 23/456.4530.633.01 do vixente orzamento provincial, quedando condicionadas á tramitación do oportuno expediente de modificación de crédito.

Cuarto. Darlle traslado do presente acordo á empresa TRAGSA S.A., S.M.E., MP, e aos Servizos de Arquitectura, Intervención, Contratación e Asistencia Intermunicipal.

O que lle comunico a Vde. para o seu coñecemento e efectos, coa salvidade que establece o art. 206 do RD 2568/86, de 28 de novembro.

*Asinado dixitalmente na data que figura á marxe.*

Contra este acordo que pon fin á vía administrativa poderá interpoñer recurso potestativo de reposición perante o mesmo órgano que o ditou, no prazo de un mes a partir do día seguinte ó desta notificación (*artigos 112 e 124 da Lei 39/2015, de 1 de outubro, de Procedemento Administrativo Común das Administracións Públicas*), ou ben, directamente recurso contencioso-administrativo perante o Xulgado do Contencioso-Administrativo de Pontevedra segundo o disposto no artigo 8 da Lei 29/1998, de 13 de xullo, Reguladora da Xurisdición Contencioso-Administrativa, e todo iso no prazo establecido no artigo 46 da citada Lei. Todo iso sen prexuízo de que poida utilizar calquera outro recurso que estime conveniente.

